

PENGASINGAN SAMPAH

Rakyat Malaysia hasil 37,890 tan sisa setiap hari

➔ Jumlah dianggar terus meningkat, tapak pelupusan sampah tepu

BH - 11/6/19 CMIS (6)

Oleh **Suhaila Shahrul Annuar**
suhaila.shahrul@bh.com.my

Putrajaya

Rakyat Malaysia menghasilkan kira-kira 37,890 tan sisa setiap hari dengan sekurang-kurangnya 1.17 kilogram (kg) dijana bagi setiap individu.

Jumlah itu dianggar terus meningkat seiring pertambahan populasi penduduk dan lebih membimbangkan, ia akan menyumbang kepada ketepuan tapak pelupusan sampah di seluruh negara.

Timbalan Ketua Pegawai Eksekutif (Teknikal) Perbadanan Pengurusan Sisa Pepejal dan Pembersihan Awam (SWCorp), Dr Mohd Pauze Mohamad Taha, berkata tindakan dan tanggungjawab perlu diambil semua orang ke arah mengurangkan penajaan sisa setiap hari kerana kos dikeluarkan kerajaan untuk pengurusan sampah

amat tinggi.

Sebagai contoh, kos pengurusan sampah bagi tujuh negeri di bawah pengurusan SWCorp iaitu Wilayah Persekutuan Putrajaya dan Kuala Lumpur; Johor; Melaka; Negeri Sembilan; Pahang; Kedah dan Perlis mencecah RM2 bilion setiap tahun.

Cara pembuangan dengan sampah betul

“Jumlah itu sebenarnya boleh dikurangkan, jika masyarakat mengamalkan cara pembuangan sampah dengan betul termasuk menjadikan pengasingan sisa daripada punca sebagai amalan dan mempraktikkan kitar semula.

“Pengurusan sampah dengan cara betul ini penting kerana jika ia tidak dilakukan mengikut cara sepatutnya seperti pelupusan dan perawatan, ia akan memberi kesan kepada alam sekitar pada masa depan seperti pencemaran air dan



Longgokan sampah yang tidak diasingkan di rumah flat sekitar ibu negara.



Jangan pandang ringan kepentingan amalan kitar semula kerana ia amat penting”

Mohd Pauze Mohamad Taha,
Timbalan Ketua Pegawai Eksekutif (Teknikal) SWCorp

tanah yang akan mengganggu sumber air negara,” katanya.

Mohd Pauze berkata, jangka hayat sesebuah tapak pelupusan adalah 20 hingga 25 tahun bergantung kepada keluasanannya.

Katanya, tanah yang dijadikan tapak pelupusan sampah pula tidak boleh digunakan untuk sebarang pembangunan atau projek kerana ia perlu dirawat sekurang-kurangnya selama 20 tahun selepas itu berikutan ada air larutan serapan (leachate) dan gas berbahaya dengan kadar pencemaran sangat tinggi.

Amal kitar semula

“Selain itu, pembangunan, terutama di kawasan bandar semakin pesat menyukarkan lagi proses mendapatkan tanah sesuai dijadikan kawasan pelupusan sampah kerana masyarakat tidak mahu ia

terletak berhampiran rumah.

“Bagi kawasan pesat membangun, tanah kosong yang ada hanya di kawasan tadahan air dan hutan simpan yang tidak sesuai dijadikan tapak pelupusan. Justeru, apa yang perlu dilakukan adalah mengurangkan janaan sampah, amalkan kitar semula dan menggunakan teknologi bagi merawat sisa ini.

“Jangan pandang ringan kepentingan amalan kitar semula kerana ia amat penting dan impaknya sangat besar kepada kehidupan seharian dan masa depan kita.

“Sampah sesuatu yang amat sensitif, masyarakat tidak mahu ia dekat dengan rumah mereka. Sebab itu kita perlu cari alternatif seperti beralih dari tapak pelupusan sisa pepejal termasuk tapak pelupusan sanitari kepada Loji Sisa Ke Tenaga (WTE),” katanya.

Penduduk tak endah arahan lakukan pengasingan

BH - 11/6/19 (m/s 16)

Putrajaya: Masih ramai penghuni di Pusat Pentadbiran Kerajaan Persekutuan di sini, tidak melakukan pengasingan sisa pepejal dari punca walaupun sudah tiga tahun mereka diwajibkan berbuat demikian.

Tinjauan di beberapa bangunan kediaman bertingkat mendapati penduduk sewenang-wenang membuang sampah tanpa mengasingkannya terlebih dahulu.

Kebanyakan sisa yang dibuang dalam tong disediakan dalam rumah sampah tidak diasingkan mengikut kategori sepatutnya untuk dikitar semula.

Lebih menyedihkan, ada sampah dilambakkan di atas lantai rumah sampah dan barangan yang sepatutnya boleh dikitar semula terbiar begitu saja dengan dihurung lalat.

Jaring kitar semula yang sepatutnya digunakan untuk pengasingan barang juga terbiar kosong dan ada barangan lain yang tidak sepatutnya dibuang dalam kemu-

dahan itu.

Bagaimanapun, amalan pengasingan sisa pepejal dari punca bagi kediaman bertanah lebih positif dengan sampah diasingkan dalam tong khas disediakan.

Sampah yang boleh dikitar semula diasingkan mengikut kategori sepatutnya, tanpa dibuang merata-rata.

Pelbagai alasan

Seorang penghuni kediaman bertingkat yang mahu dikenali sebagai Ani, berkata dia tidak pernah mengasingkan sampah kerana melihat tidak ramai melakukannya.

"Saya tahu peraturan itu tetapi tidak mengamalkannya kerana agak leceh. Memang sayang barang yang boleh dikitar semula dibuang begitu sahaja, tetapi kadang kala tiada masa menguruskannya.

"Bagaimanapun, jika semua melakukannya, saya rasa tiada masalah untuk yang lain mengambil tindakan sama," katanya.

Di **Johor Bahru**, walaupun

Majlis Bandaraya Johor Bahru (MBJB) membekalkan sangkar kitar semula kepada penghuni kediaman bertingkat bagi memudahkan mereka mengasingkan sisa pepejal sejak empat tahun lalu, penduduk tidak memanfaatkan kerana kurang kesedaran.

Datuk Bandar Johor Bahru, Datuk Amran A Rahman, berkata penghuni juga tidak peduli mengenai kepentingan pengasingan sisa pepejal terutama kesannya terhadap alam sekitar dan mutu kehidupan generasi akan datang, sekali gus menyebabkan inisiatif berkenaan tidak berkesan.

"Agak mendukacitakan apabila ada pihak menyalahgunakan kemudahan itu dengan menggunakannya untuk membuang sampah domestik dan bukannya sampah yang boleh dikitar semula.

"Namun begitu, MBJB menerusi Jabatan Kesihatan MBJB, Ahli Majlis MBJB dan SWCorp akan terus menggerakkan promosi bagi membangkitkan kesedaran warga ban-

dar raya tentang pentingnya pengasingan sisa pepejal," katanya.

Tiada kuasa ambil tindakan

Di **Kuala Lumpur**, Dewan Bandaraya Kuala Lumpur (DBKL) tiada kuasa untuk mengambil tindakan undang-undang terhadap pemilik premis yang enggan mengasingkan sampah.

Bagaimanapun, Datuk Bandar Kuala Lumpur, Datuk Nor Hisham Ahmad Dahlan, berkata pihaknya tetap berusaha untuk menjayakan dasar itu dengan melaksanakan pelbagai inisiatif seperti menggalakkan amalan kitar semula.

"DBKL juga melaksanakan program pembelian minyak masak terpakai yang dilaksanakan di beberapa kawasan komersial/bangunan DBKL dan pasar malam.

"Kita juga melancarkan Program Inisiatif Hijau di Pasar Borong KL untuk mengasingkan sisa sayur untuk dijadikan baja kompos dengan menggunakan spesies lalat 'black soldier fly'," katanya.

BH dalam laporan eksklusif sebulan melaporkan hanya 10 peratus daripada 1.25 juta kediaman bertingkat di tujuh negeri melaksanakan pengasingan sisa pepejal di premis masing-masing meskipun sudah tiga tahun peraturan itu dikuatkuasakan.

Ini bermakna penghuni di 125,000 premis bertingkat menjadikan pengasingan sampah sebagai amalan mereka, manakala selebihnya masih liat walaupun keengganan mereka berbuat demikian boleh mendatangkan musibah kepada negara.

Pengasingan sisa pepejal di punca diwajibkan bagi premis bertanah dan bertingkat di tujuh negeri yang menerima pakai Akta Pengurusan Sisa Pepejal dan Pembersihan Awam 2007 sejak 1 Jun 2016.

Negeri berkenaan ialah Wilayah Persekutuan Kuala Lumpur dan Putrajaya, Pahang, Johor, Melaka, Negeri Sembilan, Perlis dan Kedah, membabitkan 53 kawasan operasi pihak berkuasa tempatan (PBT).